

Fraccion MEP:

Xiomara Maduro (MEP):

Mike Eman no a ricibi sosten riba nombramento di gobernador for di AVP

ORANJESTAD - Parlamento a reuni cu sr Mike Eman riba peticion di Sr. Rene Herd  y Sra. Marisol Lopez-Tromp. Ambos a manda un serie di pregunta tocante e procedura di nombramento di Gobernador cu prome minister Mike Eman mester a contesta.



E asistencia di e parlamentarionan di AVP tabata masha pover. Solamente Sra. Lorna Varlack, Sr. Marlon Sneek y Sr. Chris Dammers a sostene Sr. Rene Herd  y Sr. Donny Rasmijn a yega mas laat. Ningun otro Parlamentario di AVP tabata presente, mostrando asina un falta di interes total. Mostrando un falta di respet pa cu nan lider Mike Eman.

E fraccion di AVP pa basta tempo tin problema interno. Y tin hopi sostenedo di AVP tambe ta malcontento pasobra nan ta haya nan lider Mike Eman hopi zwak.

E reunion den Parlamento tabata uno hopi particular. Sr. Mike Eman tabata muestra bou di hopi presion y tabata perde su linea varios biaha.

Un rato el a bisa e ta dispuesto pa bringa te na morto, despues el a bisa cu el a entrega pa paz den Reino.

Si di berdad Sr. Mike Eman tabata kere den autonomia, lo el a bin busca sosten den Parlamento y despues bay lucha na Nacionnan Uni.

Pero na luga di esey Sr. Mike Eman a scoge pa entrega mesora, admiti cu el a comete un eror den e procedura di nombracion y na luga di lucha pa autonomia di pais Aruba, el a entrega pa paz den Reino. Na final lider di MEP a haci Sr. Eman e pregunta: si ni nombracion di un Gobernador bo por haci drechi, si ni e procedura di Gobernador bo por aplica corectamente, anto berdad bo no ta sirbi pa dirigi e pais aki!



Hopi pregunta riba e nombramento di Gobernador nobo a keda sin contesta di Minister Eman



ORANJESTAD - Ministernan Eman y Sevinger mester a duna cuenta den un reunion di vragnuur riba e drama rond di e nombramento di e Gobernador nobo pa nos Pais. Como cu ta trata di un reunion di vragnuur, e dos Parlamentarionan cu a haci pregunta por escrito y cu a pidi pa Minister Eman bin contesta den Parlamento, a haya turno prome pa haci nan pregunta y despues e otro Parlamentarionan a haya un minuut di tempo pa haci pregunta. Nos a logra haci 7 pregunta, pero manera a para bira custumber hopi pregunta a keda sin haya un contesta concreto di Minister Eman.

Preguntanan haci na Minister Eman

1. Dicon Sr. Boekhoudt no ta bon pa Minister Eman y AVP pa e funcion di Gobernador? 2. Nos por haya copia di tur correspondencia entre Gobierno y Hulanda riba e nombramento di Gobernador? Nos por haya e conseho tambe di abogado Sjiem Fat manera cu Minister Eman a indica? 3. Minister Eman por splica den ki forma Hulanda a sugeri candidato? 4. Den ki forma Minister Eman a protesta contra e decision di Hulanda? 5. Minister Eman ta aproba tur lastramento di Sr. Boekhoudt y su famia? 6. Minister Eman ta bay duna un dispensa publico? Si ta si, ki dia ta haci esaki. Si ta no, dicon? 7. Pakico Minister Sevinger a bay Hulanda tambe y pakico e t'ey awe den e reunion aki den manera un talisman?

Ningun contesta concreto

Minister Eman no a duna ningun contesta concreto. Riba e pregunta dicon Sr. Boekhoudt no ta bon pa Minister Eman y AVP, e mandatario a indica cu ta principio ta conta y cu ta Gobierno ta nomina. Pero Minister Eman no kier a bisa concretamente ta dicon e no kier mira Sr. Boekhoudt den e puesto di Gobernador. E mandatario a keda keto riba e pregunta di lastramento di Sr. Boekhoudt y su famia y e dispensa publico cu nan lo mester haya. Na luga di esaki Minister Eman a bisa cu e sacrificio mas grandi y e prijs mas caro ta AVP a page, ya cu asina mes cu tur cos ta muestra cu Hulanda a actua robes, AVP a scoge pa sacrifica y stop tur discusion cu Hulanda riba e tema aki pa por tin paz den Reino. Esta un hilaridad y muestra di cobardia di

Minister Eman cu a muestra aki di laga Aruba cay tanten cu Reino keda bon. Pa local ta trata e pregunta di e presencia di Minister Sevinger na Hulanda y den e vragnuur, Minister Eman tampoco kier a duna un contesta. Esaki ta muestra cu ta di berdad Minister Sevinger a fungi djis como un talisman pa Minister Eman, cu by the way no a trece ningun suerte cu ne ya cu ni na Hulanda of na Aruba su presencia por a kita e berguensa for di e cara di Minister Eman den e drama aki rond di e nombramento di Gobernador nobo.

Oportunismo politico

Mester remarca cu Minister Eman a tuma masha hopi tempo pa tilda MEP di ta practica oportunismo politico cu e drama rond di nombramento di e Gobernador nobo y cu opocion mester rise to the ocacion y para banda di AVP aki nan pasobra cu cosnan a bay robes. Aki atrobe Minister Eman kier culpa otro pa su propio fayonan. Pero no ta MEP, sino AVP ta esun cu cada bes ta haci cos di entreguista y ta e propio Minister Eman a haci uzo di oportunismo politico pa nombra Sr. Boekhoudt pa Minister Plenipotenciario pa Gabinete Eman na Den Haag y awor diripiente no kier splica dicon e mesun persona aki no ta apto pa AVP y Minister Eman pa por fungi como Gobernador pa nos Pais. P'esey Minister Eman mester examina su mesun consenshi prome cu e bin tilda MEP di algo cu e mes ta practica den optima forma. Ma tur esaki Minister Eman ta bin cu ne djis pa desvia atencion pa e por keda sin duna contesta concreto na e preguntanan riba e nombracion di e Gobernador nobo pa nos Pais.

Presidente di Parlamento:

Vragenuur” a trata e procedura di nombracion di Gobernador



ORANJESTAD - Presidente di Parlamento, Mervin Wyatt-Ras a informa cu tabata tin un “vragenuur” den Parlamento pa trata e procedura di nombracion di Gobernador nobo pa Aruba. Sr. Rene Herde di fraccion di AVP a pidi e vragenuur aki y despues a ricibi preguntanan tambe di parlamentario independiente Sra. Marisol Lopez-Tromp.



Ministro Presidente, mr. Mike Eman a contesta preguntanan y a informa Parlamento mas den detaye di un carta cu gobierno a manda pa gobierno Hulandes, esta minister Plasterk pa muestra e descontento di Aruba en cuanto dicho procedura. Manera cu minister a splica ta cu Hulanda no a scoge entre e candidatonan cu a wordo manda a base di e reglamento pa loke ta trata nombramento di Gobernador, sino a propone su propio candidato y a manda esaki den un tempo hopi cortico pa Rey firma den

un Koninklijk Besluit.

Manera splica a desvia di e procedura. Gobierno sin embargo a scoge pa no bay guerra cu Hulanda, mas bien a muestra su mal contento den un carta. Despues ora gobierno a bay Hulanda a yega hunto cu Hulanda na un declaracion conhunto. Minister Plasterk mes ta papia di un schoonheidsfoutje ora e ta papia di e procedura di nombracion. Despues cu gobierno a contesta e preguntanan, e miembronan di Parlamento cu a haci pregunta a haya cada

un 2 minuut pa haci remark'e y preguntanan adicional. E otro miembronan di Parlamento a haya 1 minuut pa haci pregunta den caso nan tabata tin esaki.

Por bisa cu e tabata un “vragenuur” productivo unda cu diferente documento a wordo otorga na miembronan di Parlamento y Parlamento por a wordo informa debidamente. Loke alabes a muestra ariba dje ta e falta di un “conflict-” of “geschillenregeling” pa atende cu diferencianan di e indole aki. □